

福宁府志

(下册)

〔清〕李拔纂

李怀先 季左明 颜素开 点校

福建省宁德地区地方志编纂委员会

福宁府志卷之十七

秩官志

循吏

吏以循称，志其实也。实之所在，曰政，曰教。古之称善政者，首推龚、黄；称善教者，莫如安定。昭昭史册，在人耳目尚已。我皇上激浊扬清，官方式序。拔按宁虽僻在海隅，不乏良吏。故老所传，遗文所纪，今犹得而溯之曰：某也，善政。民歌孔迩；某也善教，士歌乐只。良以勋德在人，虽世远年湮而食德饮和，深入人心，自不能忘耳。其人存则爱而颂之；其人亡则尸而祝之。美其前所以风其后也。观者可以兴矣。志循吏。

长溪县

五代

许光大 沿海都巡验。寓居硯江。寇至，光大奋身接战。谓乡人曰：“胜则江水清，负则江水赤。”既没于阵，江水如血者三日，尸随潮归。乡人即其地祀之。

宋

蔡高字君山。仙游人，襄羊。进士。景祐中尉长溪县。媼二子渔于海而亡，媼指仇家所害。高宿海土，七日尸浮而至，验之，皆杀也。遂捕仇家伏法。有夫妇出，而盗杀其守舍子者。高亟召里人熟视之，指一人曰：“此杀人者”。讯之果服。人称神明。迁太康簿。卒年二十八。详见《欧阳文集》。祀名宦。

黄琮字子方。莆田人。进士。元符中，尉长溪，戢吏便民，每出巡警，乡人莫知。居丧去位，民哀其贫，贖之不受，徒步护丧归。祀名宦。

潘中宇民极。浦城人。进士。靖康改元，令长溪。旧志作宣和，讹。教化翔洽。会二帝北狩，拜诏涕泣交颐，成诗五章，以泄忠愤。有“二帝蒙尘事北征，小臣无计泪如倾”句。辞极凄惋。会建平叶侂叛。虑其迫境，团结民兵，号“忠义社”为备。明年，贼势益张，宁德告急，赴之，夜战被执。贼闻其名，胁之降，叱曰：“汝受朝恩，养父母妻子，辄敢负叛，我恨不斩汝万段。乃与贼俱生耶？”遂遇害。时建炎二年七月朔也。事闻，赠朝请大夫，官其一子明德。祀忠义。

黄龟朋字君锡。邵武人。庆元三年为县令。兴学校以育才，置学田以养士。为林维屏立祠，祀乡贤。

方之泰字严仲。莆田人。嘉泰中县令。祠乡贤。扬楫、杨复、黄干。汰冗职，增弟子员。岁荒，例钱尽蠲之。

姚东宇明仲。尤溪人。进士。庆元中调长溪①簿。适大旱，东祷即雨。民喜曰“主簿雨”、令丞廨被灾，簿署独存，人以为诚心所格。

赵时焕字元晦。晋江人。宗室子。嘉定进士。调长溪尉，

摘奸发伏，邑号神明。辟湖湘师。祀名宦。

杨志 字存诚。尤溪人。进士。嘉定十四年为县令。视篆数月，百废具举，词赋有声。砌杨梅岭，建金波桥，民思之。后判广州。卒，祀名宦。

刘镇 字方叔。乐清人。嘉定中任。王十朋荐之疏云：屡更州县任使，所至皆有治绩。明敏之政，吏不能欺。长溪政绩尤著”。民为立祠。祀名宦。

鲍逊 字克顺。平阳人。进士。淳祐元年令。明允刚断，民无冤狱。水军总戎欲增军船额，逊为民争之，获遣士民赴诉请留者数千。不获。既去，民思之不已。淳祐四年，刊其善政闻于朝者复起为司农。祀名宦。

黄恪 字叔谨。剑南人。淳祐二年为县令。初，赤岸田陂。自宋开宝来，屡圯于水。王伯大以参政漕于闽，委恪发佛寺余粟，支监课羨金，自捐横木三百株，截流填巨石为三级，大壮陂势。引水灌田千余亩。至今赖之。祀名宦。

萧山 沙县人。长溪县丞。性颖敏，于书无所不读。究极精奥。著有《读书传心》、《论语讲》、《说易管见》、《延平志》载《儒林传》。

元 福宁州

张伯颜 字正卿。至顺元年知福宁州。均赋役，革冗滥，禁侵渔，杜请谒，刚正有声。修学养士，置田立教。祀名宦。

王伯颜 字伯敬。滨州沾化人，身長八尺，美仪度。倜傥有大志。尝语人曰：“世治为良臣，世乱为忠臣。庶不愧此生耳！”至正九年，以朝列大夫尹福宁。初，猾吏林子善主造黄籍，巧为飞诡，多推少收，籍不可稽，役户累困。伯颜发其奸，因乡

计产，令民自相质别。置局选吏掌之，躬宿于局。赋役均，平民无游手。修学，拓地建庙及堂。朝夕躬视，至忘寝食。置学田，建城隍，闾巷、坊表、城门次第整饬。迁福建盐运副使，百姓如失父母。诣廉访使乞留。七月，红巾边寇逼境，伯颜曰：“福宁民犹吾子，吾忍舍之去乎？”乃立四门为垒，募民训练以备，谕乡民团结保守。贼分道至境，以千户严不花、长泰主簿陈文积守西门。自率中子相，引兵至杨梅岭。战败。贼还大集，退守州城。遣巡检阮宗泽御南道，宗泽与贼战于古县，死之。壬午。严不花、陈文积开西门遁去，贼突入。伯颜奋身力战，马中流矢，遂逸北门被执。贼首谓伯颜曰：“公廉能素著，欲屈公仍尹此州，何如？”伯颜曰：“吾受天子命守兹土，义当杀贼。今败，惟有死耳，宁能从贼反耶？”贼强之跪，伯颜曰：“此膝可断，不可跪！”贼怒殴之。伯颜嚼舌喷血贼面，大骂曰：“吾失守土，义当死贼，即杀我，何殴为？”会贼执监州至，责之曰：“汝何得与尹同拒我？”伯颜又骂曰：“起兵者实我，非监州。且吾起兵灭贼耳，何名拒耶？吾生不能杀贼，死必杀贼矣！”贼愈怒。遂遇害于东门外。神色不变，立而受刃，出血尽，白头坠地，而体不仆。时年六十矣。死数日，面如生。民无老稚号哭不绝。贼亦悔杀伯颜。俄有毒蜂如云，屯贼庭。民收葬侯尸而蜂散。贼中常见伯颜引兵入州治，皆惊蹶。贼首无故自弊。

伯颜死，相亦被执。贼欲官之。相曰：“吾与贼不共戴天，顾欲从尔耶？”亦死之。相妻潘被执，贼首欲乱之。潘以新产告召医林来，潘哭曰：“吾以失所天，死固其所，岂以身受辱？苟念我夫官，幸以死药进。”林不忍，趋出。乃闭口绝食，及二幼女皆死焉。民为具棺，葬其子妇。仍殡伯颜柩于东郭佛祠。明年

贼再至燔祠，长子楨自吴兴来，负遗骸归，夫人安氏亦疾死。明年僧林德成，起兵讨贼，望空呼曰，“王州尹率阴兵助我斩贼！”时贼正祠神，睹红衣军来，以为真，迎之忽没，贼大败。福宁遂平。连率吴克忠以闻，赠嘉议大夫、济南路总管、上轻车都尉、追封太原郡侯越六年，行部御史余阙令立庙祀之。

楨袭父爵，除绍兴路总管。后张士诚陷郡，楨亦死节。

呜呼！真可谓忠孝节义，萃于一门者矣。

太守李拔诗云：

大夫忠义冠尘寰，死后犹瞻生气还。

九土昏昏流碧血，一家烈烈卧朱殷。

可怜蜂蚁哀头发，无复杨梅见甲环。

去我于今经两代，闻风更自泪潸潸。

张玄赞 至正中判官。十三年三月，红巾陷州城，赞死之。

明 福宁州成化九年以前为知县，后为知州

龙存仁 字淑心。湖广监生。洪武十八年知福宁。修废坠，恤孤寡，兴学校，除民害，理冤狱，均赋役，政治一新。期年去任，士民思之。

周德兴 濠州人。太祖起兵，德兴率先归附。累功封江夏侯。洪武二十年，节钺福建沿海备倭，所筑十六城。府城、大金、定海等处巡司，关寨，烟墩，皆其经画。至今赖之。

郡守李拔有诗：

龙虎云屯合，将军濠上行。提戈扶日月，挥剑吐生平。

鼙鼓一声振，壶浆万户迎。闽南通御气，江浒曜皇灵。

鞭石环金帐，麾旄铸铁城。今朝勤望古，想见概英英。

尹昌隆 字彦谦，江西太和人。举应天乡试第一，会试第

二。洪武三十年三月，榜一甲第二人。同榜首陈郟下狱得释，授翰林院编修，改监察御史。洪武三十一年，皇太孙即位，视朝稍晏，上疏切谏，诏以奏疏颁示天下。建文元年二月，京师地震，诏求直言，上疏言：“奸臣专政，阴盛阳衰。谪见于天。”执政恶之，出知福宁县。清勤自砥，科差必验丁产而高下之，吏无所售其奸。公暇召诸生讲业。已而，上悔曰：“求直言，而以直弃可乎？”诏复原官。靖难兵南下，上疏切言，当许燕王入朝。比文皇御极，按名捕戮，特原之。命输皇长子于北平。后以建储事洩，坐死。

张铎 字振文，清江人。进士。宣德初，以御史督宁德银课。在县数年，崇学校，礼师儒，构观濶亭，建御书楼，修庙学造祭器，百废具兴。时年甫二十四岁。今祀名宦。

张鹏 字腾霄，西安人。宣德年以御史监宝丰场，先是一岁四进场课，民病之。鹏奏减其二，民赖以甦。

焦玉 字温夫，汶上人。右副千户。宣德五年，海寇至，从都指挥刘海捕寇，分哨至小管洋山，与贼遇战死之。

程奎 字文昭。婺源人。宣德六年教谕。学优行粹。修明伦堂，饰圣贤像。泮池产瑞莲。著有《赋》载《艺文》。

竺渊 奉化人。以参议守刘洋。正统二年，坑徒流劫，渊为李龙所害。事闻，封镇山护国侯。立祠祀之。

项智 字伯仁。浙江西安人。正统初知县事。性度宽洪，温而厉。修学校，均徭役，百废具兴。有争讼者，每令退省，以发其良，民讼以息。今祀名宦。

胡庭芳 字子兰。东莞人。监生。景泰间知县。廉慎恤民。加意学校，公暇集诸生讲课。入觐卒，士民怀之。

刘广衡 江西万安人。以御史抚闽浙。景泰年，寿宁郑怀茂乱，公与副使沈讷讨平之。议请设立县。民思其功，立祠以祀。子乔、孙玉，皆宪副于闽。世济其美。

沈 讷 吴县人。景泰年按察副使。督理银场。闻台山寇乱，亲往讨贼，中枪夹矢，战益力。士卒竞奋，卒歼丑类。民德之。与刘广衡俱祀报功祠。

刘 象 字有仪。安福人。成化九年，县复为州。知州事，勤政惠民，建廨舍，百废具举。十一年，改建州堂。十六年，大旱祷雨。以疾卒。先是，龙首山童而磬礧。形家病之。象植松四万余株，郁然成林，民比之甘棠云。今祀名宦。

何乔新 字廷秀。广昌人。进士。成化九年，分守建宁道，按部福宁，奏复为州。以学后般若庵为伯颜祠。勘恤福安水灾。历官刑部尚书。谥文肃。入名宦。

黄 晟 字以明。石首人。成化九年州判官。敏干刚果。建广宁、大金仓、城隍庙、儒学、堂廨。修理福安、宁德二城，咸有力焉。

邱秉中 字希尧。南海人。举人。成化十一年学政。时新建州学，严条教，勤课业。学者咸称得师。著州志四卷。

吴廷珙 浮梁人。成化年参议。时福宁诸路凶荒，设法赈济，生养死理。人咸赖之。

胡 富 字永年。绩溪人。成化间佾事。阅福宁狱，直冤者四百余人。历官尚书。谥康惠。

马 迪 字惠吉。仁和人。监生。成化十六年州同。请慎敏捷，修举废坠。有便民者，无不为也。善诗篆。所至多留题。

郭祥鹏，太和人。进士。成化十八年知州。岁歉，赈济有

方，甦民甚众。后知眉州。《州志》称其持廉秉公。历官参政本州候潮亭有记。

蒋 辉 全州人。举人。邵武同知，摄州事，志操清白，均民徭役，贫富不偏，民甚德之。

杨 泽 天台人。进士。以宪副行部至州。修学，集诸生讲究若师友。祀朱子于般若庵。葺王伯颜祠，有记。

闵 鸷 字廷举。浮梁人。弘治十年学正。严于课士，多所成就。署州政，雪死冤百余人。民为之颂。曰：“化雨早沾群弟子，春风更被众冤人。”著有《福宁乡贤传》、《困斋集》。

杨 苍 字举松。吓江人。监生。弘治十一年任训导。沈静不妄言笑，处人温恭而执事有恪，或始病其偏，而终服其操。从官唯童仆二人。其素履多类此。

李 时 东莞人。举人。弘治十六年知州。才似无为，其惠爱之心，确然不可易。正德戊辰入覲，逆瑾先期吓贿，视藩省大小为等差，榷闽金三万，科州千数，李竟不与。藩臬衔之。秩满，臬欲罚民清军道，民哭求救。时曰：“汝辈不入见，策之上也。”遂无一人至者。臬怒，时应之曰：“政体自下而上，由州核其事，可免自决之劳”。事竟寝。

陈德鸣 字显道。太和人。举人。正德二年学正。生徒来学者助以蔬粥，规避者责之不贷。模范端整，而恩意周至。上交不谄，下交不渎。升教授，官至监察御史。

黄 遂 字廷重。浮梁人。监生。正德二年训导。教生徒嘉善而矜不能。在位五年，非公不至州堂。耿介有声。祀名宦。

万廷彩 字文明。江西武宁人。举人。正德五年知州。苞苴不入，门无私谒。时瑾党多索于州，悉拒之。为政精勤，厘革吏

弊。遇里役，计丁产以供，无不平者。兴学，修坛，两关置漏泽园。在官六载，穷乡民情，无不周知。官至浙江参政。祀名宦。

欧阳嵩 字汝中。太和人。进士。正德九年知州。刚正不屈，吏惮其明。开城东南河一千八百丈，溉田数千顷。复买田建河资仓以贮租，为后人疏浚之费。建文庙西庑。创敬义、德业二书院。士民怀之，为立生祠，今祀名宦。

汪如玉 字德温。林宁人。正德十三年为州训。资性宽厚，取与不苟。因材施教，成就有方。士有嗜学不给者助之。三年卒于官，诸生悼之，椁归，送者毕至。

李缙 字廷仪。丰城人。举人。正德辛巳。以兴化同知摄理州事。明决精敏，狱无滞囚。不事鞭扑，豪猾慑服。详请解福州余银，以纾民力。日惟蔬菜自给。二月代去，人有余思。

桂荣 安仁人。举人。以邵武推官署州事。革里长供费。视事三月，案无留牍。

赵道隆 无锡人。举人。福州府判官，两署州事。性情介，政便民。有上舍罹非辜，一家受囚，赵直之得释。

赵廷松 字子后。号鹤山。乐清人。进士。授刑部主事。嘉靖六年，以议大礼谪州同，听断如神。修道路、兴学校、革奸弊、均徭役。凡民有讼者，为诗以劝之。州万里林，故盗藪。公伐木建康夷楼，拨民丁壮以守，自是行旅无虞。有盗论死，欲挽以重赂，公怒，竟成其狱七年。戊子，柘洋流贼劫掠，赵领军追捕，师溃，赵挺身见贼曰：“宁杀我，毋杀我军。”贼畏其威，皆逃窜。又出征宁德，民赖以安。为文章取法乎古。教士如师弟。及去，以书籍颁书生。官至山西左布政。今祀名宦。

罗仲溷 丰城人。嘉靖间，仓大使。却贖辞饋，以廉正闻。

谢廷举 彬州②人。举人。嘉靖十四年知州。廉洁惠爱，保民如子。深山穷谷，一以情通。修州志、铲吏蠹、平贼役，民间利病，无不周知。十八年，有诏开州矿，百斤止银二钱。得不偿费。锦衣千户李隆，请益其数，公力拒之得罢采。语具时事志。州派银三千余两，具三山驿，力与上官争，草奏疏万言，欲上之朝，乃减其半。公去数年，复取盈焉。民思之如失父母。

孙 勋 号次薇。南海人。举人。嘉靖二十六年任知州。洁己爱民，自奉如寒士。时海上军书狎至。新命都御史朱。治兵于闽，自浙入闽，州供给不如意，欲庭挞州官，孙顾谓行杖者曰：“挞我者必重，庶快其忿，不然汝死杖下矣。”百姓感泣，日拥其舆以行，初军门至，民咸惧。比出境，闾阎无忧。在任四年。擢常德府同知。

钟一元 号侍山。秀水人。进士。嘉靖三十三年知州。知盐商专利病民，力扼之，使不得纵。民免淡食之苦。复欧阳守河资田。州西郭无城，乃营筑西城，计六百余丈。甫竣而倭至。民德之，像而祀焉。详具《生祠》、《筑城》二记。

柴应宾 鄞县人。举人。三十七年知州。是时倭警，里甲市井苦军需。柴至，一洗前弊。布政司发兵饷，寄州库。参将黎鹏举领出为资银，以诬库子。当道刑之重，柴闻诤之曰：“参将以封识无损领去，况库尚存千余可查。安得有此样银？盖鹏举与应宾有隙。驾害吾民，以玷名节也。若诬库子，请锁应宾与鹏举解两院辨明。”当道乃下台，挽其手慰之。诬释。有漳军林子信之子，窃赵氏婴儿手镯，赵追究，子信推其子溺于池。柴立辨赵枉。明年卒。民哀亡。初城牒久圯。宾至，刻期修砌，市砖百里外。堞完而倭大至，城赖以守。

夏汝砺 字维金。融县人。以南安令擢知州。开义井、培雉堞，有能声。尤加惠造士，凿泮池，架以石桥。改官去，犹给其直而后行。

项乔 字迁之，号瓯东，永嘉人。进士。以兵部主事谪州同。下车革宴费，携所刻牧民条约，举业详说示诸生。署壁云：“平生之志，不在温饱。”明年擢去。历官广东参政。今祀名宦。

刘复芳 宣城人。以监生授州同。端慤廉静。州有故人子差干之，对曰：“先情后理，纵公亦私。”屏不与语，逾年入覲，行李萧然。吏部嘉其廉，为改清秩不就。

许士经 南海人。举人。学正。恩礼待士。辑杨龟山以至朱子门人，理学渊源曰：“《道南观感录》及《俊山家训》刻之。朱节妇顾氏没七年矣。无能举其节者，经为请于当道，立碑表之。

章文粹 泾县人。简易和厚，学问渊邃，口不言利，日讲贯《毛诗》发明要旨，从者随叩辄应。同官多令其子就学焉。已未倭众次城，柴州牧病，以示属，章综画有条，安民御寇。未几卒于官，士民哀之。

鲍恺 余姚人。嘉靖清湾司巡检。通易参同契，悟真篇大义。见黠货者，虽所亲亦艳然去。

金浙 号松涧。东阳人。进士。嘉靖间，以参议守福宁。严毅英断，自奉清约。立天监支薄自凜。调兵救民，各有纪法。观察漳南，抚军征餉，浙独不与，曰：“倭患固急，独不虑大帽山寇乎？”欲具奏，同僚止之，餉遂寝。

汪珀 字仲宏。休宁人。按察司佾事，分部福宁。时倭狴

起，议征海上兵以备福宁，均谓：“寇舟乘风至，皆战地，备城何益？”乃移戍沿海要地。既而寇迫同安。察狱囚陈嘉善等七人，黠勇可用，令出之，赐洗沐，谕讨贼赎死，咸感泣愿效。大出兵邀贼，擒杀百余，贼遁去。事闻，七人贷死。

舒春芳 鄱阳人。进士。分巡建宁。闻倭警，兼程至州散金，檄清藩、运二司及福州、延、建，济银四万有奇。募客兵万余，征三沙、大金等倭。躬甲督战于赤岸桥，与士卒共饭。既而聚铁制銃，以金钱为的，中即与之。兵益精。倭复攻城，火箭齐发，贼霄遁。

顾 鼎 号远斋。慈溪人。以参议巡州。时方多事，议取协济银数万两，募兵万余人，为州备倭。皆顾及春芳之力也。详舒春芳传内。

黄希宪 号毅所。进士。分巡州治。化民以德、勤行乡约。二县供给不受，留金三百而去，籍诸库。

徐 作 号念吾。南昌人。进士。以参政巡州。政尚简静。城东西隅近山，贼得凭以窥伺。徐建敌楼制之。至今永赖。

李 乐 号临川。归安人。进士。以佥事来巡。廉毅勤敏，事皆亲裁。爱民锄奸，人不能欺。

吴之鹏 号翼云。武进士。刑科转佥事，分巡州治。靖寇安民，剔除奸弊。迁按察使。致政归。

徐甫宰 山阴县举人。嘉靖己未，以武平令奉檄核饷。至州数日，倭入寇，蚁聚东郊。州牧柴病笃，遽请以印属徐。下令人守一垛，虽死勿移，简勇士为游兵。夜灯悬垛，寇不复敢内窥。有三悍贼，舞双刀薄东城。命发炮毙之。与渠西大战金字山，连发数十炮，贼尽殪。会夜贼喊城下攻东南，徐令急备西北。贼果从

西北梯城。徐投巨石击，贼弃梯去。已而，倭大至，合围攻城，登北山，箭下如雨。徐神色不变，守益严。发虎尾轮炮，贼死甚多，焚东郊而去，遂陷福安，而州无虞，皆徐力也。后更以剿武平山寇有功，擢金宪。

张 璧 指挥金事。任烽火寨把总。倭寇岩前，众趋避之。璧曰：“我世受国恩，有死耳！”事闻，录其孙邦奇袭指挥使。

李 纪 号月渠。泗州人。进士。以参议驻福宁。建 筹 边 楼，兴学校，礼士爱民。擢去，州人攀辕泣送。

陆万垓 字天溥，号仲鹤。平湖人。进士。隆庆二年任知州。聪敏丝纶，剖决如流，瞬息成案。胥吏不能得讼者一钱。兵兴赋增，力为节缩。请诸抚按，岁省金六千有奇。当道文移有不便民者，辄反复辨析。州俗良贼无畦畛，仆隶多凌其主，力惩之，俗为一变。先是，客兵更戍福宁，至则投歇民舍，民苦其扰。万垓造营城外，处之编甯图里，析兵西城，大得民心之和。海产盐，而鹺酋与巡檄者通，鱼肉之，盐倍价，民苦淡食。捕治其酋，而盐始通，暇进诸生论文，捐俸资诸生。在官四年，家给人足，吏畏民怀。去之日，老稚走送数里。至今称善政必曰陆公云！

刘介龄 号鹤台。南海人。进士。万历元年知州。廉洁简易。时议增游兵。于正供外加兵饷。龄叹曰：“民力竭矣！吾不忍。”事遂寝。凡宴会必昼日，曰：“夜则滋弊也。”善书法，多留题。

罗文靖 号次山。南昌人。举人。万历三年知州。操履廉洁，政尚宽恕。州故有里银五百，官吏乾没，相沿久矣！靖至，申详革之，凡州中给赏，湔涤一尽。去之日，行李萧然。民为立

祠。今祀名宦。

祝永寿 号望坪。临川人。举人。万历八年知州。浑厚精明，爱民礼士。下车视城，易砖修固。清查赋籍，悉出己手。政治廉能，比于陆公。秩满擢荆州同知。民德之为立碑。与罗公同祠。

史起钦 号敬所。鄞县人。进士。万历十九年知州。年少敏达。州值火煨烬，疮痍甫定。起钦政尚宽仁，兴衰起废，公署学校，焕然一新。浚城河、置学田、建文昌阁。秩满擢常州丞。民为立碑。附陆公祠。

钱士鳌 号石庵。钱塘人。进士。万历二十二年知州。夙持硕望，吏治精明。两造辑集，言立决。待理者晨往夕归无烦宿春粮也。胥役仅供，使令狡黠慑伏。终公任不敢受一钱。政闲游山水名胜，多所题咏。超然出尘。二年卒于官，百姓哀之罢市三日，吊者不绝。棕厝，哀送百里。像祀元妙观。竖碑西郊。

李瑄 字邦和。丰城人。丁丑进士。万历年按察金事，驻福宁。浚河练甲，爱民修法。时闽清令吏掾为奸。瑄按法上书，触阁臣忌，削籍。

崔师训 号宏台。进士。万历间，以参政分巡驻州。勤慎和平，恤民不扰。听讼淳复，劝谕尤切。勤思防海，亲历要冲。冒暑以卒。民哀而祠之。

车 箴 将乐人。万历八年学正。刚方正大，待士有恩，赙贫恤丧。学者为立去思碑。

马邦良 富阳人。进士。由户科外补副使。镇州。浑厚精明，下情悉达。秩满迁甘肃。合属怀之。立生祠于西郊。

林腾鹄 永安人。万历间训导，博学纯德。诸生修脯，一切

却之。捐俸资士，不足则继以家人钁钁。迁晋江教谕。众为立去思碑。今亭在西郊犹存。

洪翼圣 吁县人。进士。万历二十七年知州事。莅政勤慎，不尚刑法。常捐学田，以贍贫士。

镇 丙 臧宁人。万历年吏目。洁己爱人，尤便商贾。以勤卒于官。民为殓殮，哭而归之。

方孔炤 号仁植。桐城人。进士。万历四十八知州事，始至，建学宫、开玉带池，竖中天坊、敬一亭，复龙光塔。甫二年以员外郎迁去。士民建祠立石，曰：思乐亭。

凌义渠 号茗柯，归安人。进士。崇祯年礼科给事中。与时相温体仁不合，出为福建参政。精勤厘剔，一尘不染。后为大廷尉，殉甲申之难。

揭重熙 字祝万。临川人。五经进士。崇祯十三年知州。以清廉明敏称。建菱湖书院。日与诸生讲学论文，夜分无倦色。后重熙于桐木关就俘，系建宁狱，门人孝廉陈士道、贡生朱国龙随入狱。赋诗慷慨，狱卒闻者泣下。后与重熙俱斩于建南街。其从者邓贵、戴凤亦殉于侧。乾隆二十一年，府学教授康天墀撰记。设主于文昌祠旁舍。系原创书院基。

徐丙晋 字载九。松江人。进士。崇祯间知州事。性敏决。两造烦琐，数言立剖。以廉洁称。民竖功德坊及祠祀之。

国 朝

陆怀玉 顺治初福宁道。整躬率属，清核额赋，吏不为奸。颁《行知学衍义》、《小学传注》于州郡。既去，闽廷思之。

周文华 康熙初知州。训士爱民，修葺学宫城垣。百废俱举。报升而卒。

师佐 号靖公。进士。康熙二年知州事。时值播迁，安集流亡，严禁差扰。民苦虎患，为文驱之，虎远去。迁苏州丞。民祠祀之。

吴万福 辽东人。康熙年镇宁。盗贼屏息，耿逆难作，整兵血战，粮尽，一家不屈死之。事闻。赠太子少保，荫一子。康熙三十年祀九忠祠。

周士元 荆州监利人。康熙三十三年总兵。整俗爱民，树松木、浚城濠^③，建义学、置义塚，至今颂之。

颜光旸 号宜庵。江南亳州人。雍正元年任总兵。开罗汉山坝址，以备旱潦，运米赈荒，备仓发粟，请恤台戍，政简人怀。为立去思碑。

张良弼 贡生。长安人。雍正二年知州。初莅任，治尚严肃。既而威惠兼行。陶民淑士，弊除利举，邑无冤狱。去之日，民皆泣送。后改福清游击。

^③以上知州

康天墀 龙溪人。乾隆辛酉举人。先以选贡入国学。行己以古道自敦。口不言利。尝北上，有同乡者卒于京邸，墀慨运其柩至河，舟发始还，试期已过，终无悔色。屡秉铎修教职。二十一年升福宁教授。每日至文庙亲拂拭洒扫，祭则备物尽志，一如古礼。尝捐金浚泮池，凿石竖棖星门，摄理县学。改进五王祠，重新两学木主。课士论文，终日不倦。于主敬道理，尤多发明。莅任未久卒于官。囊无余赏，生徒为之殡殓。勒石志思，复祀其主于揭公祠。